



## **Aningaasaqarnermut Naalakkersuisoq**

### **Ataasinngornermi ulloq 15. august 2011 Aningaasaqarnermut Ataatsimiititaliap aalajangernera pillugu Naalakkersuisunut ilisimatitsissutit – Suliaq nr. 01.31.06/11-00547**

#### **Nummi umiarsualivimmik containerersorfiusumik nutaamik misissueqqaarnissamut aningaasaliissutinik missingersuutitut sunniteqanngitsumik nikisiterineq - suliassamik suliareqqiineq**

Naalakkersuisut **inassutigaat**,

- kontumi pingaarnermi 87.73.10 Umiarsualiviit, aningaasaliissutit 2,633 mio. kr.-inik amerlineqassasut, agguarneranni suliassamut nr. 999.24.106 Umiarsualivinni misissueqqaarnerit, aningaasaliissutit 0,792 mio. kr.-inik ikilisillugit aammalu suliassamut nr. 060.23.005 Umiarsualivik containerersorfiusoq nutaaq, Nuuk, aningaasaliissutit 3,425 mio. kr.-inik amerlillugit
- kontumi pingaarnermi 87.73.22 GLV – Mittarfiit, aningaasaliissutit 1,185 mio. kr.-inik ikilisinneqassasut, agguarneranni suliassamut nr. 033.24.939 Narsarsuarmi talittarfiup iluarsanneqarnera, aningaasaliissutit 0,291 mio. kr.-inik ikilisillugit aammalu suliassamut nr. 120.25.024 Ilulissani mittarfik, aningaasaliissutit 0,894 kr.-inik ikilisillugit
- kontumi pingaarnermi 89.71.40 Nukissiorfiit, sanaartornermut taarsigassarsiarititat, suliassamut nr. 100.99.201 Imeqarfimmik iluarsaassineq, Asiaat, aningaasaliissutit 1,448 mio. kr.-inik ikilisinneqassasut

#### **Aningaasaqarnermut Ataatsimiititaliap oqaaseqaatai**

Aningaasaqarnermut Ataatsimiititaliaq ataatsimiinnermini kingullermi aalajangerpoq qinnuteqaat itigartinniarlugu (Suliaq nr. 11-544). Naalakkersuisut maanna Aningaasaqarnermut Ataatsimiititaliaq qinnuigaat suliassamik suliarinneqqeqqullugu tamatumunngalu atatillugu Ataatsimiititaliamut tapiliussatut paasissutissanik nassiussaqarlutik. Paasissutissani nutaani pingaartumik pineqarput

- Nummi Umiarsualivik attaveqarnerup sinneranik ineriartortitsinissamut naleqqiul-lugu suliniut,
- attaveqarnermut suliassani sisamani aningaasat atorneqangitsut, aningaasalersuinnermut atorniarneqartut,
- aktiaateqarluni ingerlatseqatigiiffimmik Nuuk Atlanthavn A/S-imik pilersitsineq, kii-salu
- Nunatta Karsianut aningaasatigut sunniutaasussat.

Ataatsimiititaliap qinnuteqaammut nutaamut isumminnginnermini kissaatigaa Ineqarnermut, Attaveqarnermut Angallannermullu Naalakkersuisumik apersuinnermik ingerlatsinissani. Apersuineq tallimanngornermi ulloq 19. august 2011 nal. 12.30 ingerlanneqassaaq Inatsisartut ataatsimiittarfianni 2-mi. Apersuinnermi apequtit uku akineqarnissaat kissaatigineqarpoq:

Ataatsimiititaliap ilisimaaraa Assartuussineq pillugu isumalioqatigiissitap naatsorsorsimagaa Nummi containerersornermut umiarsualiviup allineqarneratigut inuiaqatigiit aningaasaqarni-

arnerat eqqarsaatigalugu pissarsiassaq 9,2 procentiusoq. Isumalioqatigiissitap taama naatsorsuineq tutsuiginartorujussuartut oqaatigaa. Ataatsimiititaliaq aalajangersimasumik tunngavissaqanngilaq isumalioqatigiissitap sulinerata inerneru illuatungilissallugit, ataatsimiititaliarli isumaqarpoq naatsorsuinerit taakku isumalioqatigiissitap kaammattuutaanut naatsorsuinerinullu naalackersuinikkut isummorsornernik tapertaqartinneqartariaqartut.

1. Assartuussineq pillugu isumalioqatigiissitap kaammattuutai tunngavigalugit nuna taamaat ataatsimut isigalugu assartuussisarnerup angalannerullu iluini sanaartugassanut aningaasaliissutit pillugit Naalackersuisut sunik isumaliutersuuteqarpat?
2. Isummernissamut tunngavissiami oqaatigineqarpoq matumani siunertarineqartoq ”... *Nuummi umiarsualivimmik containerersorfiusumik nutaamik sananissaq pillugu isumalioqatigiissitap inassuteqaataata malitseqartinneqarnissaa*”. Taamatut malitseqartitsinissami sunarpiaq pineqarpa?
3. Assartuussineq angallannerlu ataatsimut isigalugit kiisalu umiarsualiveqarfiit immikkut isigalugit ukiunut qulinut aggersunut sanaartugassanik pingaarnersiulluni tulleri-aarineq qanoq ittoq (massakkuugallartoq) Naalackersuisunut ilaasortap kissaatiginartip-paa?
4. Aningaasaqarnermut Ataatsimiititaliap suliassamut matumunnga atatillugu aalajangiinnermini 11.544-mi oqaatigaa, ataatsimiititaliap kissaatiginartutut isigigaa Assartuussineq pillugu isumalioqatigiissitap isumaliutissiissutaa tunngavigalugu assartuussinerup angallannerullu iluani sanaartugassanik Inatsisartut pingaarnersiueqqaarnissaat, pingaarnersiunerup tamatuma ilaanik pituttuisunik aningaasaliissuinik qinnuteqaatinik ataatsimiititaliaq akuersissuteqartinnagu. Qinnuteqaatip matuma nassiunneqarnera ataatsimiititaliap kissaataanut oqaatigineqartumut tassunga qanoq naapertuutsigaa?
5. Assartuussineq pillugu isumalioqatigiissitap isumaliutissiissummini kaammattuutigaa sineriassorluni ilaasunik angallassisarnermut tapiissuteqartarnek unitsinneqartariaqar-toq. Taamaakkaluartorli taamatut angallassisarnerup ingerlatiinnarneqarnissaanut aningaasaliissutinik Naalackersuisut qinnuteqarput, taamaaliornikkullu ersersillugu naalackersuinikkut pingaarnersiuneq aningaasaqarniarnikkut isumaliutit tunngavigalugit pingaarnersiunermit salliutinneqartariaqartoq. Naalackersuisunut ilaasortaq maanna aningaasanik qinnuteqarpoq Assartuussineq pillugu isumalioqatigiissitap kaammattuutai tunngavigerpiarlugit. Naalackersuisunut ilaasortap isumaa naapertorlugu suliassami matumani aningaasaqarniarnikkut isumaliutit naliliinerillu tunngavigalugit sooq aalajangiisoqartariaqarpa, taakku Arctic Umiaq Line eqqarsaatigalugu tunngavigine-qanngippata?
6. Suliassaq manna aatsaat ukiup tulliani aallartinneqassagaluarpat tamanna suliniummumut qanoq sunniteqassava, taamatullu aamma suliniut immikkut isigalugu aamma Nuummi umiarsualivik inuiaqatigiillu ataatsimut isigalugit taakkununga aningaasatigit qanoq sunniteqassava?
7. Ataatsimiititaliap nalunngilaa Assartuussineq pillugu isumalioqatigiissitap isumaliutissiissutaa Naalackersuisut nassuiaatit UKA11-mut Inatsisartunut oqaluuserisassanngortinniaaraat. Oqallinneq tamanna assersuutigalugu sap. ak. 38-imi ingerlanneqarsinnaasunngorlugu isumaliutissiissummik tamarmiusumik tamatumunngalu atatillugu nassuiaammik saqqummiussisutitalimmik Inatsisartut oqallinnerminni atorsinnaasaannik Naalackersuisut saqqummiussaqaarsinnaappat, suliniullu eqqarsaatigalugu pilersaarusiordermi taama kinguaattoorneq attanneqarsinnaassava, taamaalillunilu misissueqqaarnerit suliniummumut pisariaqartut kissaatigineqartutut 2011-mi ingerlanneqarsinnaallutik?
8. Suliniutip kinguartinneqarnera suliniummi peqataasunut allanut, soorlu kommunimut,

imaluunniit aningaasalersuineq eqqarsaatigalugu periarfissanut ajortumik kinguneqar-sinnaava?

9. Isummernissamat tunngavissiap matuma akuerineqarnissaata kinguartinneqarneratigut suliniummi peqataasut allat mattunneqassappat misissueqqaarnerit pisariaqartut nammineq ingerlassinnaanerinit, ajornassanngilalu taamatut ingerlatsisoqassappat tamatumunga atatillugu aningaasartuutit kingusinnerusukkut akunnerminni namminneq agutaarnissaannut?
10. Isummernissamat tunngavissiamut ilanngussami 1-imi takuneqarsinnaavoq Namminersorlutik Oqartussat Nuuk Atlanthavn A/S-imut 40 mio. kr.-inik aningaasaliissu-teqarniartut umiarsualiveqarfiup atuuttup pigisatut nalilittut aningaasaliissutigineqarneratigut. Umiarsualiveqarfik atuuttoq qanoq nalilerneqarlunilu akia aalajangersarne-qarpa?
11. Ataatsimiititaliap atugassaatur ilassutitut paasissutissani (Ilanngussaq 1) oqaatigine-qarpoq Nuummi umiarsualivimmik alliliineq taamaaliortoqassappat nunatta sinnerani umiarsualiviit allat pilliutigalugit pissanngitsoq. Tamanna Naalakkersuisunut ilaasortamut itisileqquneqarpoq.
12. Isummernissamat tunngavissiami immikkoortumi ”Tunuliaqutaq”-mik qulequtalimmi suliassanut naammassineqartussanut takussutissiaqarpoq, soorlu inatsisilerinnermi ikiorteqarnermut, VVM pillugu nassuiaasiornermut il.il. Taakkununga akit taaneqartut qanoq aalajangersarneqarsimappat, taamatullu aamma aningaasartuutit annikinnerpaatinniarlugit neqeroorteqartitsisoqarsimava?

Suliniut manna pillugu suliame 11-544-mi ataatsimiititaliap aalajangiinerani oqaatigine-qartutut Ataatsimiititaliap eqqumiigaa Sanaartugassanut Iluarsagassanullu Aningaasateqarfimmit suliniutitoqqanit ilaatigut aningaasanik ikigisassaanngitsunik nuussisoqartarsinnaanera. Ilaatigut Naalakkersuisut isummernissamat tunngavissiaanni kingullermi takuneqarsinnaavoq Aasianni imeqarfiup nutarterneqarnissaa pillugu suliniummit, suliniutitut 1999-imili pi-lersinneqarsimasumit, 1,5 mio. kr.-ingajannik nuussisoqarsinnaanera. Assut eqqarsarnarto-qarpoq suliniummut taama pisoqaatigisumut aatsaat maanna sanaartornermut naatsorsuutitunik tunniussisoqarsimammat. Tamanna aamma atuuppoq aningaasaateqarfimmi suliniutitut alla-nut aningaasanik aallerfiginiarneqartunut. Ajornartorsiulli tamanna nutaajunggilaq Aningaasa-qarnermut Ataatsimiititaliarlumi ukiut ingerlanerini arlaleriarluni Sanaartugassanut Iluarsagas-sanullu Aningaasaateqarfimmi suliniutini salisoqarnissaanik pisariaqartitsineq tikkuartareerpaa. Ataatsimiititaliap taamatuttaaq uparuareerpaa pisariaqarmat Naalakkersuisut aningaasanut inatsimmi kontumik pingaarnermik 80.00.10-mik Sanaartugassanut Iluarsagassanullu Ani-ngaasaateqarfimmit utertitat aningaasanut inatsimmi naatsorsuutigineqartutut siunertaa naa-pertorlugu atuinissaat, suliniutinit naammassineqarsimasunit aningaasat sipporuttut kontumut pingaarnermut taaneqartumut nuunneqartarnerisigut. Aningaasaqarnermut Ataatsimiititaliap suliassani 10-482-mi aamma 10-478-mi aalajangiineri taakkununggalu atatillugu kingusinnerusukkut allagaasartut innersuussutigineqarput.

13. Sanaartugassanut tunngasuni aningaasaliissutit aqutsineq eqqarsaatigalugu Aningaasaqarnermut Ataatsimiititaliap kissaataata naammassineqarnissaanut sunik periarfisaqartoq Naalakkersuisunut ilaasortap takusinnaavaa, Naalakkersuisunullu ilaasortap taakku aalajangersimasumik qanoq timitalerniarpai?
14. Suliniutinit, naak assersuutigalugu sanaartornermut naatsorsuutit naammassineqarsimanngikkaluartut, naammassineqareersimasutut oqaatigineqartariaqartunit aningaasanut Sanaartugassanut Iluarsagassanullu Aningaasaateqarfimmi suliniutinit nuunneqarsinnaasunut erseqqissumik takussutissiortoqarnissaa kissaatigineqarpoq. Ataatsimiititaliap nalunngilaa taamatut missingiineq nalorninartortaqarsinnaasoq, taamaattoqassappalli Naalakkersuisunut ilaasortap taakku missinginnermut atatillugu taasinnaasari-aqarpai.

15. Nuummi containerersorluni umiarsualiviliornissamut misissueqqissaarnerit amerlaqaat ukiunilu kingullerni arfineq-marlunni millionerpassuarnik naleqareersimalluni. Paasisutissat suut amigaatigineqarpat misissueqqissaarnerillu ingerlanneqareersut amigartutut isumaqarfigineqarpat?
16. Itisileqquneqarpoq soq suliassaq ima tuaviortigisutut isigineqarnerisooq allaat Inatsisartut Assartuineq pillugu isumalioqatigiissitap isumaliutissiissuutaanik oqalliseqarnissat utaqqineqarsinnaanani.

Ataatsimiititaliap naatsorsuutigaa apersuinermi malitsitut apeqquteqartarsinnaanani.

-----

Ataatsimiititaliap Naalakkersuisumik apersuinerisa Naalakkersuisunut ilaasortap ataatsimiititaliallu akornanni pingaarnersiulluni tullerriaarinerit anguniakkallu pillugit naalakkersuinermut tunngasumik oqaloqatigiinnertut sapinngisamik iluseqartinneqartarnissat Aningaasaqarnermut Ataatsimiititaliamit anguniarneqarpoq. Taamatut oqallinneq ammasumik oqallinnertut sapinngisamik ingerlanneqassaaq.

Kiisalu apeqqutit siuliani allassimasut pillugit allakkiamik kalaallisut danskisullu ataatsimiititaliap Naalakkersuisumik apersuineranut atatillugu pissarsisinneqarnissani Aningaasaqarnermut Ataatsimiititaliap kissaatigaa. Allakkiap ataatsimiititaliap Naalakkersuisumik apersuinerata kinguinngua uunga nassiunneqarnissaa qinnutigineqarpoq: [nch@inatsisartut.gl](mailto:nch@inatsisartut.gl). Allakkiap ataatsimiititaliap Naalakkersuisumik apersuinessaanut nassarneqarpat atorneqarpallu taasuma nuutinnera ataatsimiititaliap Naalakkersuisumik apersuinerata aallartinnerani ataatsimiititaliap oqalutnaanut ataatsimiititaliallu allatnaanut tunniuteqquneqarpoq.

#### **Aningaasaqarnermut Ataatsimiititaliap aalajangenera**

Siuliani allassimasutut paasinnilluni Aningaasaqarnermut Ataatsimiititaliap Naalakkersuisut inassuteqaataannut isummernissani **kinguartippaa** apersuinerup taaneqartup ingerlanneqarnissaa siunertaralugu.

Aningaasaqarnermut Ataatsimiititaliap sinnerlugu

Olga P. Berthelsen  
Aningaasaqarnermut Ataatsimiititaliap siulittaasua